

<https://kampusuols.com/article/422668/U-In-News/JOHOR/Sultan-Johor-hadiahkan-pesawat-Lake-Renegade-LA-270-untuk-program-aeronautik-UTHM>

Sultan Johor hadiahkan pesawat Lake Renegade LA-270 untuk program aeronautik UTHM

[BERNAMA](#) 21 September 2018

**BATU PAHAT** - Sultan Johor, Sultan Ibrahim Sultan Iskandar akan menghadihkan sebuah pesawat Lake Renegade LA-270 kepada Universiti Tun Hussein Onn (UTHM) sebagai tanda sokongan baginda terhadap pembangunan program aeronautik di universiti itu.

Dalam titah mengumumkan perkara itu, Sultan Ibrahim menasihatkan agar pesawat jenis Amphibious buatan Amerika itu dijaga dengan baik.

“Saya juga amat berbangga kerana UTHM menawarkan program aeronautik yang mempunyai keunikannya tersendiri iaitu dengan menggabungkan aspek teknologi kejuruteraan aeronautik dengan pelesenan penerbangan profesional yang diiktiraf dalam pasaran,” titah baginda yang juga Canselor UTHM.

Baginda bertitah pada Majlis Titah Tuanku Canselor UTHM bersempena ulang tahun ke-25 universiti itu di Dewan Sultan Ibrahim, UTHM di Parit Raja, di sini, semalam.



*Sultan Ibrahim berkenan melihat spesies semut yang diberi nama Echninopla Tunkuabdujalil di Dewan Sultan Ibrahim, UTHM Batu Pahat, semalam.*

Sultan Ibrahim juga berkenan dan bersetuju agar landasan kapal terbang lama di Tanjung Labuh, di sini, dibangunkan semula dan di jadikan sebagai pusat latihan penerbangan untuk pelajar UTHM.

Sultan Ibrahim bertitah, baginda difahamkan Program Ijazah Sarjana Muda Teknologi Kejuruteraan Aeronautik adalah yang pertama di Malaysia dan satu-satunya program yang ditawarkan di Asia Tenggara.

Malah, baginda bertitah, hanya terdapat empat sahaja universiti yang memiliki gabungan program tersebut di seluruh dunia.

“Oleh itu, saya menyeru kepada Kerajaan Persekutuan untuk memberi sokongan dan bantuan bagi menjayakan program ini secepat mungkin. Program aeronautik ini bukan sahaja dapat melonjakkan nama UTHM tetapi juga membuka peluang yang besar dalam pembangunan industri aeronautik di negara ini,” titah baginda.

Sementara itu, Sultan Johor turut menyokong cadangan universiti itu memperkenalkan program Sarjana Muda Teknologi Kejuruteraan Pengangkutan Rel.



## INFO

LAKE RENEGADE LA-270

**\*Pesawat amfibia**

**\*Enam tempat duduk**

**\*Buatan Amerika Syarikat**

**\*Dibina pada 1982**

**\*Dikeluarkan syarikat Lake Aircraft**

**\*Cecah kelajuan 258km/j**